

**UCAPAN MENTERI KEDUA PENDIDIKAN DR MALIKI OSMAN DALAM
MAJLIS PELANCARAN BULAN BAHASA 2022 PADA 3 SEPT, PUKUL 8.30
MALAM**

1. Saya mengucapkan terima kasih kepada Profesor Madya Muhammad Faishal dan Puan Rahayu Mahzam atas undangan ke Majlis Pelancaran Bulan Bahasa 2022.
2. Kita telah memerangi COVID-19 sepanjang dua tahun setengah. Kita telah menyesuaikan cara bertugas, sama ada secara dalam talian atau hibrid. Penganjur Bulan Bahasa juga telah menganjurkan kegiatan secara maya dan menjalankan program-program dalam talian. Ia menunjukkan keupayaan kita membuat penyesuaian dan daya tahan kita. Sekarang, Singapura dalam keadaan yang lebih baik dalam menangani COVID-19 dan saya berasa gembira sekali dapat bersama anda secara fizikal. Saya berasa amat bangga melihat ramai rakan kerjasama bersemangat dan bersama-sama meraikan dan melestarikan bahasa dan budaya Melayu.
3. Sepanjang dua tahun ini, Jawatankuasa Bulan Bahasa, dengan sokongan semua rakan kerjasama seperti MESRA, semua MAEC, Wisma Geylang Serai, Lembaga Perpustakaan Negara dan Taman Warisan Melayu, telah menganjurkan pelbagai program seperti Siri Cendekiawan Lestari yang dianjurkan oleh Yayasan Warisan Melayu, Aksi Si Cilik anjuran MAEC Tampines Central dan pelancaran buku Geylang Serai: Dalam Terowong Masa anjuran Wisma Geylang Serai yang telah membantu masyarakat kita kekal kukuh dengan warisan budaya kita.
4. Justeru, tema Bulan Bahasa tahun ini: 'Cita. Citra. Cinta Bahasa Kita' amat bermakna kepada diri saya. 'Cita' menekankan aspirasi masyarakat kita untuk mengekalkan kerelevanan bahasa Melayu. 'Citra' menggariskan kepelbagaian dalam cara kita menggunakan dan menyesuaikan bahasa kita dan bagaimana bahasa Melayu berpotensi untuk menjadi jendela ilmu pengetahuan kita. 'Cinta' menekankan perlunya meneruskan usaha kita untuk menyemai rasa cinta dan penghargaan kita terhadap bahasa Melayu dan dalam diri anak-anak muda kita.
5. Tetapi, dalam kita memupuk penghargaan dan penguasaan bahasa Melayu dalam kalangan generasi akan datang, pembelajaran bahasa tidak dapat dilakukan di sekolah sahaja. Bahasa harus digunakan dalam kehidupan harian, disokong oleh ibu bapa dan

masyarakat. Dengan ini, kita dapat terus menyediakan dan meluaskan persekitaran yang menggunakan bahasa Melayu.

6. Justeru, keluarga memainkan peranan penting dalam penggalakan bahasa, budaya dan nilai masyarakat kita. Saya gembira melihat Hans dan Fir, Duta Bahasa kita yang baru dilantik tahun ini mempunyai hubungan yang rapat dengan orang-orang kesayangan mereka meskipun mereka mempunyai jadual yang padat. Walaupun sibuk, Hans dan Fir terus menyemai minat dan cinta akan bahasa Melayu kepada anak-anak mereka masing-masing. Hans dan Fir: Sebagaimana anda memberikan inspirasi kepada anak-anak anda, saya berharap anda berdua akan terus memberikan inspirasi kepada masyarakat kita untuk menghargai Bahasa Ibunda kita.
7. Bulan Bahasa tahun ini, yang akan berlangsung dari pertengahan bulan Ogos hingga awal bulan Oktober, akan menampilkan barisan aktiviti yang menarik. Ini termasuklah kelas penghayatan puisi dan tarian Melayu, bengkel melukis Batik, atau sesi menimba ilmu silat. Saya berharap, anggota masyarakat kita, termasuk yang muda dan muda hatinya, akan mengambil bahagian dalam aktiviti-aktiviti Bulan Bahasa dan berkongsi pengalaman dengan keluarga, rakan-rakan dan orang-orang tersayang. Dalam masa yang sama, ambillah peluang yang tersedia untuk mengenalkan bahasa dan budaya Melayu kepada rakan-rakan anda yang bukan Melayu menerusi berbagai kegiatan yang dianjurkan sepenuh Bulan Bahasa.
8. Penggalakan bahasa dan pemupukan budaya merupakan projek yang tidak ada penghujungnya. Namun, dengan usaha masyarakat dan sokongan pertubuhan seperti Dana Kedwibahasaan Lee Kuan Yew (LKYFB) dan Jawatankuasa Pembelajaran dan Penggalakan Penggunaan Bahasa Melayu (MLLPC), saya percaya kita akan dapat terus menyemarakkan obor bahasa dan budaya Melayu untuk generasi masa depan kita.
9. Izinkan saya mengakhiri ucapan saya dengan serangkap pantun

Adat kita berbahasa,

Cerminan jiwa, jati diri;

Adab kita menyusun kata,

Biar sopan, lebih pekerti.